



## **SAMARQAND VILOYATI NUROBOD TUMANI HOKIMI QARORI**

141100, Nurobod tumani, Mustaqillik ko‘chasi, 2-uy. Tel: (66) 633-16-34, (66) 633-21-65, e-mail: nurobod.t@exat.uz

2022 - yil 13 - oktabr

255-7-99-Q/22

Nurobod tuman hokimligi

### **Tumanda umumi ovqatlanish mahsulotlarining ayrim turlarini maxsus ajratilgan joylarda sotish tartibini tasdiqlash to‘g‘risida**

Tumanda O‘zbekiston Respublikasi Vazirlar Mahkamasining 2003-yil 13-fevraldagagi “O‘zbekiston Respublikasida chakana savdo qoidalarini hamda O‘zbekiston Respublikasida umumi ovqatlanish mahsulotlarini (xizmatlarini) ishlab chiqarish va sotish qoidalarini tasdiqlash to‘g‘risida”gi 75-son qarori ijrosini ta’minlash yuzasidan tuman hududida umumi ovqatlanish taomlarining ayrim turlarini maxsus ajratilgan joylarda sotish tartibini belgilash maqsadida O‘zbekiston Respublikasi “Mahalliy davlat hokimiyati to‘g‘risida”gi Qonunining 6 va 25-moddalariga asosan

#### **Q A R O R      Q I L A M A N :**

1. Tuman hududida umumi ovqatlanish mahsulotlarining ayrim turlarini maxsus ajratilgan joylarda sotish tartibi ilovaga muvofiq tasdiqlansin.

2. Tuman favqulodda vaziyatlar bo‘limi (B.Xoliqulov), tuman davlat soliq inspeksiyasi (B.Ismailov), sanitariya-epidemiologik osoyishtalik va jamoat salomatligi xizmati tuman bo‘limi (B.Sulaymonov), tuman qurilish bo‘limi (M.Ibodullaev) ushbu tartibga rioya etilishini ta’minlasinlar.

3. Tuman hokimligi axborot xizmati (E.Pardayev), “Nurobod” gazetasi (N.Botirova) mazkur qaror mazmun-mohiyati va ahamiyatini ommaviy axborot vositalarida keng yoritib borish hamda “Nurobod” gazetasida e’lon qilinsin.

4. Mazkur qaror rasmiy e’lon qilingan kundan boshlab kuchga kiritilsin.

5. Ushbu qarorning bajarilishini nazorat qilish tuman hokimining birinchi o‘rnbosari R.Ibragimov zimmasiga yuklansin.

Tuman hokimi v.v.b



R.Ibragimov

Nurobod tuman hokimining  
2022 yil 13 oktabrdagi  
255-7-99-Q/22-son qaroriga  
1-ilova

## **Umumiy ovqatlanish mahsulotlarining ayrim turlarini maxsus ajratilgan joylarda sotish**

### **TARTIBI**

#### **I. Umumiy qoidalar**

1. Ushbu tartib tuman hududida majburiy tartibda dehqon (oziq-ovqat) bozorlari va savdo komplekslari (keyingi o‘rinlarda tashkilotlar deb yuritiladi) hududida umumiy ovqatlanish mahsulotlari (taomlari) ayrim turlarini maxsus ajratilgan joylarda sotish tartib-qoidalarini belgilaydi.

2 Umumiy ovqatlanish mahsulotlari (taomlari) ayrim turlarini uy sharoitlarida tayyorlab kelingan yoki joylardagi vakolatli organ qarori bilan maxsus ajratilgan joylarda ovqatlanish o‘rinlari tashkil etmasdan donali tayyorlash va sotish bo‘yicha xizmat ko‘rsatuvchi — yakka tartibdagi tadbirkor sifatida ro‘yxatdan o‘tgan jismoniy shaxslar tomonidan amalga oshiriladi.

3. Umumiy ovqatlanish mahsulotlari (taomlari) ayrim turlarini, donali tayyorlash, pishirish va sotish uchun maxsus ajratilgan joylar yengil konstruktiv qurilgan va shaharsozlik, sanitariya va yong‘in xavfsizligi normalari va talablariga javob beradigan, oziq-ovqat mahsulotlarini vaqtincha saqlash, masalliq tayyorlash, pishirish va personal shaxsiy gigiyenasiga rioya etish imkoniyatiga ega bo‘lishi kerak.

4. Ushbu tartibda quyidagi asosiy tushunchalar qo‘llaniladi:

**umumiy ovqatlanish mahsulotlari (taomlari) ayrim turlari** — masallig‘i uy sharoitida yoki vakolatli organ tomonidan maxsus ajratilgan joylarda tayyorlanib, ovqat pishirish vositalarida pishiriladigan va sotiladigan donali taomlar (somsa, blinchik, cheburek, manti, xonim, sosiskali kulcha, fast-fud va boshqa donali taomlar);

**maxsus ajratilgan joy** — belgilangan tartibda faoliyat yuritish uchun ajratilgan, umumiy ovqatlanish mahsulotlari (taomlari) ayrim turlari tayyorlanadigan va sotiladigan joy;

**talabgor** — uy sharoitida yoki maxsus ajratilgan joylarda ovqatlanish joylarini tashkil etmasdan umumiy ovqatlanish mahsulotlari (taomlari) ayrim turlarini tayyorlash va sotish istagini bildirgan yakka tartibdagi tadbirkor;

**vakolatli organ** — tuman hokimliklari;

**vakolatli davlat organlari** — tuman favqulodda vaziyatlar bo‘limi, tuman davlat soliq inspeksiyasi, sanitariya-epidemiologik osoyishtalik va jamoat salomatligi xizmati tuman bo‘limi, tuman qurilish bo‘limi;

**joylashish sxemasi** — vakolatli organ tomonidan maxsus ajratilgan joylarning oldindan tasdiqlangan joylashuvi.

## **II. Tegishli hududlarda maxsus joylarni ajratish va joylashish sxemasini tuzish**

5. Tuman hokimligi tomonidan tashkilotlar ma’muriyati taklifiga binoan umumiy ovqatlanish mahsulotlari (taomlari) ayrim turlarini tayyorlash va sotish uchun maxsus ajratilgan joy tanlangan kundan keyin 1 ish kuni davomida vakolatli organlar tomonidan joyiga chiqqan holda o‘rganiladi.

Vakolatli davlat organlari mazkur o‘rganish yakuni bo‘yicha 3 ish kunida ijobiy yoki salbiy xulosalarini talabgorga taqdim etilishi lozim.

Umumiy ovqatlanish mahsulotlari (taomlari) ayrim turlarini tayyorlash va sotish uchun maxsus ajratilayotgan joyda savdo qilishni rad etilgan taqdirda, vakolatli organlar tomonidan salbiy xulosa berish uchun asoslarni keltirib o‘tishi lozim.

Talabgor tomonidan vakolatli organning xulosasidagi rad etuvchi sabablarni bartaraf etish imkoniyati mavjud bo‘lsa, 5 ish kuni ichida qayta xulosa olish uchun yuboriladi.

Vakolatli organlar tomonidan o‘rganish natijalari bo‘yicha berilgan xulosalari uchun to‘lov undirilmaydi.

6. Vakolatli davlat organlari bilan kelishish uchun maxsus ajratilayotgan joy alohida ko‘rsatilgan holda tashkilot hududining umumiy joylashish sxemasi taqdim etilishi lozim.

7. Tashkilot hududidagi maxsus ajratilayotgan joylar sanitariya qoidalari va gigiyena normalari, yong‘indan saqlanish va shaharsozlik normalariga javob bergen taqdirda kelishiladi.

8. Maxsus ajratilgan joylarning soni hududning ijtimoiy-iqtisodiy rivojlanganlik darajasi, savdo aylanmasining yuqori va pastligi, aholining kunlik iste’mol talabidan kelib chiqib vakolatli organlar tomonidan belgilanadi.

9. Donabay umumiy ovqatlanish mahsulotlari (taomlari) ayrim turlari masalliqlarini uy sharoitida tayyorlab kelib pishirib sotish yoki maxsus ajratilgan joyda tayyorlab, pishirib sotish joylarining joylashish sxemasi tashkilot ma’muriyati taklifiga binoan vakolatli organlari tomonidan tuziladi hamda joylashuv sxemasi

xaritasi tashkilotga kirish joyi qismida ko‘rinarli tarzda joylashtirilishi shart.

Umumiy ovqatlanish mahsulotlari (taomlari) ayrim turlarini sotish uchun maxsus joylarni ajratish har ikki yilda bir marta qayta ko‘rib chiqiladi.

### **III. Umumiy ovqatlanish mahsulotlarini (taomlari) maxsus ajratilgan joylarda sotish talab va shartlar**

10. Talabgor tashkilot ma’muriyati bilan tuzilgan ijara shartnomasi asosida uy sharoitida yoki vakolatli organ qarori bilan maxsus ajratilgan joylarda umumiy ovqatlanish mahsulotlari (taomlari) ayrim turlarini tayyorlash va sotish bo‘yicha xizmat ko‘rsatadi.

Ushbu xizmat ko‘rsatish faoliyati bilan shug‘ullanish uchun ruxsatnomalar etilmaydi.

Xizmat ko‘rsatish faoliyatini amalga oshirish davomida nazorat-kassa texnikasi qo‘llanilmaydi.

Umumiy ovqatlanish mahsulotlari (taomlari) ayrim turlarini tayyorlash va sotishni amalga oshirishning majburiy talablari va shartlari quyidagilardan iborat:

- sanitariya qoidalari va gigiyena normalari;
- yong‘indan saqlanish normalari;
- texnika xavfsizligi qoidalariiga rioya qilinishi lozim.

Talabgorlar va ular tomonidan yollangan xodimlar qonun hujjatlarida belgilangan tartibda to‘liq tibbiy ko‘rikdan o‘tishlari shart.

Umumiy ovqatlanish mahsulotlari (taomlari) ayrim turlari uy sharoitida tayyorlansa, ovqat masalliqlari vaqtincha saqlanishi, taom tayyorlanishi, pishirilishi jarayoni va foydalilaniladigan xonalar hamda jihozlar sanitariya qoidalari va gigiyena normalariiga muvofiqligi yakka tartibdagi tadbirkorning zimmasiga yuklanadi.

Maxsus ajratilgan joylarda maishiy chiqindilarni yig‘ish uchun qopqoqli chiqindi qutilari bo‘lishi lozim.

11. Umumiy ovqatlanish mahsulotlari (taomlari) ayrim turlarini tashkilotlarning kirish yo‘laklari, avtomobil to‘xtash joylarida, bozor va savdo kompleksi hududida joylashgan savdo magazinlariga kirish yo‘llariga tutash joylar, hojatxona, chiqindixonaga 25 metr va undan kam masofada joylashgan hududlarda tayyorlash va sotishga yo‘l qo‘ymaydi.

### **IV. Ushbu Tartibga rioya etilishini nazorat qilish**

12. Ushbu tartibga rioya etilishini nazorat qilish qonun hujjatlarida belgilangan tartibda vakolatli davlat organlari tomonidan amalga oshiriladi.

#### **V. Yakunlovchi qoidalar**

13. Ushbu tartib asosida faoliyat olib boruvchi talabgorlarning soni cheklanmaydi.

14. Maxsus ajratilgan joylarda umumiyligi ovqatlanish mahsulotlari (taomlari) ayrim turlarini tayyorlash va sotish davomida muhandislik- kommunikatsiya tarmoqlariga ularish talabgorlar tomonidan qonun hujjatlarida belgilangan tartibga muvofiq amalga oshiriladi.

15. Ushbu tartib talablarini buzgan aybdor shaxslar qonun hujjatlarida belgilangan tartibda javobgar bo‘ladilar.